

Verskillende perspektiewe oor glossariums: Vertalend teenoor leksikografies

Ilse Feinauer, *Departement Afrikaans en Nederlands, Universiteit Stellenbosch, Stellenbosch (aef@sun.ac.za)*

Opsomming: Die term *glossarium* kom onder andere in sowel vertaling as leksikografie voor in wat lyk soos verskillende toepassings: vir vertaling — 'n lys woorde wat deur die vertaler tot die doelteks toegevoeg word; vir leksikografie — 'n tipe woordeboek of naslaanwerk. Dit lyk of die term meer dikwels in die metatal van sowel praktiese (literêre) vertaling en praktiese leksikografie voorkom as in die vertaalwetenskap en metaleksikografie. In albei gevalle word die term egter minder koherent, minder eenduidig en vaer gebruik as wat van 'n term in 'n wetenskaplike veld verwag sou word. In hierdie artikel probeer ek die uiteenlopende toepassings van die term *glossarium* sistematies te onderskei, want dit sal feitlik onmoontlik wees om *glossarium* ondubbelsoortig te definieer. Ek begin deur die ekstratekstuele en tekstuele kenmerke van die term *glossarium* te ontleed deur die verskille en ooreenkoms tussen die toepassings te toon soos dit onderskeidelik in die vertaalwetenskap en metaleksikografie gebruik word. Die artikel is meer deskriptief as normerend, maar stel tog voor dat *glossarium* gereserveer word vir gebruik in die vertaalwetenskap en dat die term *specialised dictionary* (eentalig, tweetalig, meertalig) in die metaleksikografie gebruik word.

Sleutelwoorde: GLOSSARIUM, GLOS, VERTAALWETENSKAP, METALEKSIKOGRAFIE, (LITERÊRE) VERTALING, TERMINOLOGIE, SPESIALISWOORDEBOEK, TEKSTUEEL, EKSTRA-TEKSTUEEL, LEKSIKALE DIGTHEID, VERTAALEKWIVALENT

Abstract: Different Perspectives regarding Glossaries: Translational versus Lexicographic. The term *glossary* appears inter alia in both translation and lexicography with what looks like different applications: for translation — a list of words added to the target text by the translator; for lexicography — a type of dictionary or reference work. It seems that the term more frequently occurs in the metalanguage of both practical (literary) translation and lexicography than in the metalanguage of translation studies and lexicographic theory. In both cases however the term is used in a less coherent, less uniform and more fuzzy way, than would be expected from a term used in a scientific discipline. In this article I will try to distinguish the diverse applications of the term *glossary* in a systematic way since it might be impossible to define *glossary* unambiguously. I will start off by unpacking the extra-textual and textual features of the term *glossary* showing the differences and similarities as used in the fields of translation studies and metalexicography. The article will be more descriptive than normative, but suggests that the term *glossary* is reserved in translation and that the term *specialised dictionary* (monolingual, bilingual, multilingual) is used in the lexicographic field.

Keywords: GLOSSARY, GLOSS, TRANSLATION STUDIES, META-LEXICOGRAPHY, (LITERARY) TRANSLATION, TERMINOLOGY, SPECIALISED DICTIONARIES, TEXTUAL, EXTRATEXTUAL, TRANSLATION EQUIVALENT

1. Inleiding

1.1 Oorsig van die artikel

Hoewel die term *glossarium* deur sowel die vakgebied Vertaling as Leksikografie gebruik word, wil dit voorkom of die vakgebiede se onderskeie toepassings daarvan heeltemal verskil: Vir vertaling verteenwoordig die term deesdae 'n lys woorde wat deur die vertaler, redigeerder of uitgewer by die doelteks gevoeg word; vir leksikografie verteenwoordig die term 'n tipe woordeboek of naslaanbron.

Hoe het dit gebeur dat hierdie term deur twee verskillende vakgebiede gedeel word? Tydens die vroeë geskiedenis van die Europese leksikografie was 'n *glos* 'n aantekening wat in die kantlyn of tussen die reëls by 'n Middeleeuse manuskrip gevoeg is om 'n (meestal Latynse) woorde of frase te verduidelik. Die glosse is destyds altyd in die teks geïntegreer, hetsy in die besondere reël, in die kantlyn of aan die einde van die teks. Hierdie glosse is later versamel om woordeskatalyste of glossariums saam te stel, met parafrases of vertaalekwivalente wat tematies of alfabeties gerangskik is (Hartmann en James 1998: 63). Oor die jare het die leksikografie hierdie woordeskatalyste stelselmatig ontwikkel tot waar spesialisdeskundiges moeilike konsepte identifiseer en dit in glossariums verduidelik wat óf as 'n onafhanklike teks uitgegee word óf in handboeke geïntegreer word. Hierdie konteksonafhanklike kompilasies kan een-, twee- of meer-talig wees, alfabeties sowel as tematies, linguisties én ensiklopedies. Hierdie praktyk kan dalk beskou word as die beskeie oorsprong van leksikografie soos ons dit vandag ken (Nkomo en Madiba 2011: 151).

Vandag se gebruik van glossariums in vertaalde produkte is nader aan die oorspronklike gebruik as wat by die leksikografie die geval is, naamlik aantekeninge oor moeilike woorde in die doelteks wat aan die einde van die teks ingevoeg word.

Dit wil voorkom of die term meer frekwent voorkom in die metaal van praktiese (literére) vertaling en leksikografie as in dié van die vertaalwetenskap en metaleksikografie. Moontlik is hierdie minder koherente, minder eenduidige en verwarringe gebruik van terminologie daaraan toe te skryf dat sowel vertaling as leksikografie eeue lank prakties beoefen is voordat die gebiede redelik onlangs eers as onafhanklike vakkundige dissiplines geformaliseer is; die vertaalwetenskap sedert die 1960's en die metaleksikografie sedert die 1970's.

Hierdie artikel ondersoek ook die inkonsekwente, onduidelike en ongedefinieerde aard van die term *glossarium* in die vertaalwetenskap. Hierdie verwarringe gebruik van terminologie is ongelukkig niks nuuts in die vertaal-

wetenskap nie. Dit strek so ver terug soos Holmes se bekende 1972-artikel 'The name and nature of Translation Studies' waarin hy die vakgebied van die vertaalwetenskap karteer en terselfdertyd die metataal van die vertaalwetenskap in oënskou neem. Oor Holmes se term 'Translation Studies' is self heelwat gedebatteer voor dit uiteindelik aanvaar is. Die debat oor metataal in vertaalwetenskap word in meer onlangse werke voortgesit, onder andere in *The Metalinguage of Translation* (2009), onder redaksie van Yves Gambier en Luc van Doorslaer, Anthony Pym se 'Translation Research Terms: A Tentative Glossary for Moments of Perplexity and Dispute' (2011) en Lelanie de Roubaix se 'Where Boundaries Blur: André Brink as Writer, Bilingual Writer, Translator and Self-translator' (2012).

Argumente wissel van aannames dat die "terminological chaos" 'n negatiewe impak op die vertaalwetenskap se sosiale aansien kan hê, aangesien "a coherent use of terminology is surely part of the toolkit of the longest established professions" (Marco 2009: 77) tot Snell-Hornby (2009: 132) wat vra na "compatible discourse which cultivates an awareness of differences in usage and where terms are clearly defined within the language and the school of thought for which they apply". Pym (2011: 75) se argument stem ooreen met dié van Marco wanneer hy verwys na die dubbelsinnighede en vaaghede van redelik algemene terme in die vertaalwetenskap. Hy verduidelik dat sy 2011-lys 'n poging deur navorsers is "[to] make their terms as clear and specific as possible, since the discipline of Translation Studies is currently unable to do that for them".

Dat dieselfde terminologiese inkonsekwensthede wat tot konseptuele verwarring, dubbelsinnigheid en misverstande lei, ook by sowel die leksikografiepraktyk as die metaleksikografie bestaan, blyk duidelik uit die onderstaande menings wat verwys na publikasies waarin spesialisterme op een of ander manier verwerk word. Is dit TSP-woordeboeke (taal vir spesifieke doeleinades), termbanke, termlyste, terminologiese standarde, terminologiese leksikons, glossariums? Besomi beskryf byvoorbeeld die nomenklatuur van leksikografiese werke wat ekonomiese terme hanteer as vaag en onsistematis:

Lexicographical works concerning economics (exclusively or not) are a motley set of objects. As we shall see below ..., they include a wide range of sizes, purposes, languages, editorial histories and intended audiences. And they have different names: we have dictionaries, encyclopaedias, encyclopaedic dictionaries, lexica, vocabularies and glossaries, which correspond to different kinds of reference works. The distinction between these kinds of works in practice is rather fuzzy. Several of them — both of general scope and specifically addressed to economics or the social sciences — actually carry more than one of these denominations in their title. (Besomi, in Fuertes-Olivera en Tarp 2014: 9)

Kudashev (2007: 159-160) skryf in soortgelyke trantwanneer hy die vraag probeer beantwoord: *Are terminological collections dictionaries?*

Terminological collections are published under a whole bunch of names. S. Landau (2001: 35) quotes a medical lexicographer (Manuila 1981: 58) who says in despair

Some of the names given to terminological reference works — particularly 'glossary', 'vocabulary' and 'dictionary' — have been so misused that there is complete confusion, and the title on the cover of a book is no safe guide to its contents.

Kudashev (2007: 160) maak dan die radikale stelling dat hy reken daar is geen algemeen aanvaarde definisie van die term *woordeboek* om alle woordeboekagtige naslaanwerke onomwonde as woerdeboeke te verklaar nie. Hy beskou dit as een van die ernstigste probleme in metaleksikografie, maar hierdie probleem is nie uniek aan metaleksikografie nie — die probleem is net so akut in die vertaalwetenskap. Om die term *vertaling* te definieer, moet die produk, proses en alles wat verwys na vertalers se aktiwiteite ingesluit word. Dit omvat alle stamme wat gekoppel kan word aan *vertaal-*, of alles wat as *vertalend* of *vertaalwetenskaplik* beskryf kan word. Die leksikografiese artikel van die term *translation* in *Dictionary of Translation Studies* (Shuttleworth en Cowie 1997) beslaan twee bladsye, met die eerste sin wat lui:

An incredibly broad notion which can be understood in many different ways.

In hierdie artikel probeer ek om minstens die uiteenlopende toepassings van die term 'glossarium' op sistematiese wyse te onderskei aangesien dit dalk onmoontlik is om 'glossarium' ondubbelbelsinnig te kan definieer. Eerstens gee ek 'n uiteensetting van die ekstratekstuele en tekstuele kenmerke van die term 'glossarium' om sodoende die verskille en ooreenkoms uit te lig soos dit in die vertaalwetenskap en metaleksikografie gebruik word. Onder *ekstratekstuele kenmerke* bespreek ek *waarom* iets geglos word, die *agente* wat daarby betrokke is, *wat* geglos word en *waar* die glossarium gevind word, byvoorbeeld in die para-teks of die sentrale teks. Daarna word die struktuur en inhoud van die items bespreek wat as sodanig geglos word, onder *tekstuele kenmerke*.

In 'n poging om hierdie pragmatiese en funksionele vaagheid aan bande te lê, probeer ek om die eienskappe van glossariums te identifiseer; ek probeer vasstel *hoe* vertalers en leksikograwe glos. Hierdie werkswyse dra daartoe by dat die artikel meer deskriptief as normatief van aard is.

2. Vraagstukke oor terminologie

Die term 'glossarium' as sodanig is nêrens in enige woerdeboek, glossarium of terminologielys oor vertaalsterme te vind nie.

2.1 Definisie van die term 'glossarium'

'n Moontlike lekedefinisie van die term kan soos volg lui: 'n lys woorde met een of ander verduideliking wat deur die vertaler by die doelteks gevoeg word.

Bajaj (in Munday 2009: 193) definieer die term 'glos' "minder tegnies" — soos sy dit stel — d.w.s. soos wat nievakkundiges of vertaalpraktisyns dit sal

verduidelik, as:

'n glos is beskrywende inligting wat by 'n doelteks gevoeg word om 'n bronsteks-item te verduidelik.

Dit was omtrent die beste poging om glos en sodoende 'glossarium' te definieer wat ek kon opspoor.

Ek het 'glossarium' in vyf bronne nageslaan wat vertaalterminologie behandel, naamlik:

Dictionary of Translation Studies. 1997. Shuttleworth, M. en M. Cowie. Geen inskrywing vir 'glossarium' of 'glos' is gevind nie;

Translation Terminology. 1999. Deslisle, J., H. Lee-Jahnke en M.C. Cormier (Reds.). Daar is geen inskrywing vir 'glossarium' of 'glos' gevind nie;

Veeltalige vertaalterminologie/Multilingual Translation Terminology. 2010. Beukes, A.-M. en M. Pienaar (Reds.). Daar is geen inskrywing vir 'glossarium' of 'glos' gevind nie;

MonAKO. *Online Glossary of Translation Studies Terms*, University of Helsinki. Daar is geen inskrywing vir 'glossarium' of 'glos' gevind nie;

Translation Research Terms: A Tentative Glossary for Moments of Perplexity and Dispute. 2011. Pym, A. (Red.). Die term word op die leksikografiese manier gebruik as deel van die lemma vir "Translation actions" vir die naslaan van terme in glossariums.

Hoewel die term 'glossary' deel van laasgenoemde twee bronne se titel vorm, word die term as sodanig nie opgeneem nie en dit word dus nie op die manier beskryf waarop dit in die vertaalpraktyk — veral in literêre vertaling — gebruik word nie. Slegs Pym se lys (2011: 94) bevat die term, maar met die betekenis van 'n tipe woordeboek waarin die vertaler terme kan naslaan wanneer hy/sy vertaal; met ander woorde, die gebruik van glossarium hier is om vertaling te faciliteer. Hierdie selfde betekenis van 'tipe woordeboek' word ook in die titels van sowel Pym as MonAKO se lys in die term *glossary* geakteer.

In woordeboeke wat leksikografieterme beskryf, word 'glossarium' wel opgeneem en onder andere soos volg in *Dictionary of Lexicography* (1998) gedefinieer:

Glossary: A type of REFERENCE WORK which lists a selection of words or phrases, or the terms in a specialised field, usually in alphabetical order, together with minimal definitions or translation equivalents.

Some developed into bilingual and multilingual *specialised dictionaries* (TERMINOLOGICAL DICTIONARY), but most have remained limited in size, sometimes forming part of another publication, e.g. as an appendix or INDEX in a book. (63)

In die omvattende *Wörterbuch zur Lexikographie und Wörterbuchforschung* (Wiegand et al. 2017) word die volgende inskrywing aangetref wat niksseggend is as gevolg van die sirkeldefinisie:

Glossar das; -e

erklärendes Verzeichnis von Glossen zu einem bestimmten Text.

glossary: explanatory list of glosses regarding a specific text

Die volgende beskrywing deur Nkomo en Madiba (2011: 148) kan as 'n heel bruikbare kort definisie vir 'n glossarium in die leksikografie gebruik word:

Glossaries result from the collection, description and presentation of terms

Fuertes-Olivera en Tarp (2014: 13) skryf in hulle seminale publikasie *Theory and Practice of Specialised Online Dictionaries: Lexicography versus Terminography* dat die definiëring van die term 'spesialiswoordeboek' (*specialised dictionary*), problematies is. Hulle beskou spesialiswoordeboeke nie as 'n spesifieke soort woordeboek met rigiede en goed gevvestigde kenmerke nie, maar 'n spesialiswoordeboek duï op 'n generiese konsep wat 'n reeks leksikografiese werke met verskilende kenmerke, groottes en name dek. Daarom word "glossarium" onder andere dikwels as benaming gebruik vir 'n spesialiswoordeboek. Volgens Fuertes-Olivera en Tarp (2014: 13) blyk dieselfde siening uit Hartmann en James (1998: 129) se onderstaande opmerking by hulle kort definisie van 'n *specialised dictionary*:

There is no uniform framework for this as the nature and scope of such reference works can range widely, from a brief **glossary** without definitions, through technical dictionaries aimed at lay persons, to large-scale and standardised terminological databases for subject experts and translators. — eie nadruk

Fuertes en Tarp (2014: 19) beskou spesialis- leksikografiese werke as publikasies wat 'n hele reeks verskillende benamings kan hê soos 'woordeboek', 'ensiklopedie', 'ensiklopediese woerdeboek', 'leksikon', 'woordeskatalog', 'glossarium', 'terminologiedatabase', 'kennisbank', 'hulpbron', 'instrument', ens. Vir hulle is dit die funksie, en nie die naam nie, van hierdie onderskeie produkte wat bepaal of dit as spesialis-leksikografiese werk beskou word of nie. Daar moet iets wees wat hierdie produkte saam groepeer en die kategorisering daarvan regverdig onder dieselfde oorkoepelende konsep van 'n tipe leksikografiese produk.

Vir Fuertes-Olivera en Tarp (2014: 29) is dit vanselfsprekend dat woerdeboeke geskep word om kommunikasieprobleme te voorkom en op te los. Maar woerdeboeke wat ontwerp is om kitsinligting oor 'n spesifieke onderwerp te verskaf en woerdeboeke (of ensiklopedieë) wat 'n diepgaande studie van een of meer vakgebiede moontlik maak, bied verskillende uitdagings en verg verskilende praktiese oplossings. Beteken die onderskeie funksies noodwendig ook verskillende benamings?

Ek is nie seker of hierdie metaleksikograwe se siening onderstaande probleem voldoende hanteer van 'n mediese leksikograaf, ene Manuila, wat reeds in 1981 gestel is nie:

Some of the names given to terminological reference works — particularly 'glossary', 'vocabulary' and 'dictionary' — have been so misused that there is complete confusion, and the title on the cover of a book is no safe guide to its contents.

In addition to the names mentioned there are also terminological standards, lexicons, term banks, etc.

(Manuila 1981 opgeteken in Landau, in Kudashev 2007: 159-160)

3. Ekstratekstuele karakter

Ek gaan nou kyk na die ekstratekstuele aard van glossaria in onderskeidelik die vertaalwetenskap en metaleksikografie en soos reeds gemeld, bespreek ek dit aan die hand van die volgende W-vrae: **waarom** is daar glossariums, **wie** is die onderskeie agente wat betrokke is, **wat** word geglos en **waar** word die glossarium in die teks aangetref?

3.1 Waarom is daar glossariums?

Glossariums (vertaling en leksikografie) is gebruiksitems of hulpmiddels. Die vertrekpunt vir die skep van woordeboeke en ander leksikografiese hulpmiddels, ongeag wat hulle genoem word, is die gebruikers se sosiale behoeftes (Fuentes-Olivera en Tarp 2014: 58). Dieselfde geld vir glossariums wat in literêre vertaling gebruik word.

In die vertaalwetenskap kan die *waarom* saamgevat word deur 'n deel van Genette (1997: xviii) se definisie vir 'parateks' te gebruik, naamlik dat die parateks as mediator tussen die boek en die leser optree. Die rede waarom daar in literêre werke geglos word, is om doeltekslesers in staat te stel om hulle so na moontlik met die bron teksinhoud te laat identifiseer, en om soveel van die gebruikte, gewoontes, denk- en uitdrukkingswyse te verstaan as wat hulle moontlik kan (Hatim en Munday 2004: 167). Die skep van 'n glossarium kan as ondersteuning vir en gebaar van welwillendheid teenoor die lesers beskou word, maar moenie as noodsaaklik vir die absolute dekodering van die doelteksboodskap gesien word nie. Die sosiale behoeftes van lesers, en nie hulle linguistiese of tekstuele behoeftes nie, is veronderstel om die bepalende faktor te wees by die besluit om te glos of nie. Glossariums veronderstel ook 'n suiwer kognitiewe of informatiewe funksie, naamlik die bevrediging van 'n behoeftte aan kennis, of soos Toledano Buendía (2013: 157) dit stel, "to achieve a perfect understanding of the source text".

Hier onder volg 'n skematiese opsomming van die redes vir en funksies van glossariums in onderskeidelik vertaling en leksikografie.

Tabel 1: Redes vir glossariums: vertaling teenoor leksikografie

Vertaling	Leksikografie
Tree as mediator tussen die boek en die leser op	Los probleme met betrekking tot verstaan, skryf, vertaling of redigering van spesialisvaktekste op
Kognitief – informatief Om die leser se begrip van die bron-tekso so na moontlik aan perfek te kry Om algemene kulturele en ensiklopediese inligting oor te dra	Kognitief – informatief Om die leser se begrip van die (bron)-tekso so na moontlik aan perfek te kry Om spesifieke inligting oor 'n spesialisvakgebied of linguistiese en ensiklopediese inligting oor te dra
Kommunikatief – resepsie van die doelteks	Kommunikatief – teksresepsie – teksproduksie (skryf, vertaling of revisie)

3.2 Wie is die onderskeie agente betrokke by glossariums?

Ek fokus hier slegs op die twee hooftipes agente, naamlik die skepper en die ontvanger. Daar is verskeie ander agente betrokke in die produksieproses van glossariums, wat nie hier bespreek word nie. In vertaling is die mediator (persoon wat glos en die glossarium opstel) altyd die vertaler of enige ander lid van die vertaalproduksiespan, en nie die bron-teksouteur nie. Die leser is altyd die doeltekssleser. Aangesien die mediator besluit wat die doeltekssleser moontlik nie sal verstaan nie, tree hy/sy onafhanklik van die bron-teksouteur en die doeltekssleser op. Deur 'n glossarium by te voeg, neem die mediator sterker agent-skap in die daarstel van die doelteks en indien dit die vertaler is, word hy/sy skepper in plaas van blote herprodusent van die doelteks. Sodoende word sy/haar sigbaarheid as vertaler ook verhoog.

In die leksikografie is die skepper van die glossarium meestal die leksikograaf saam met die vakgebiedekspert, maar soms slegs die vakgebiedekspert wat oor bloedweinig leksikografiese kennis beskik.

Die ontvangers of gebruikers van die glossarium in 'n vertaalde teks speel 'n meer passiewe rol as die ontvangers van die glossarium as leksikografiese produk. Laasgenoemde kan 'n veel meer aktiewe rol speel met die glossarium as hulpmiddel wanneer teks geskep, vertaal of gereviseer moet word en dit gebeur gewoonlik binne die omgewing van Taal vir Spesifieke Doeleindes (TSD).

Tabel 2: Agente betrokke by glossariums: vertaling teenoor leksikografie

Vertaling	Leksikografie
Skepper Vertaler Produksiespan	Skepper Leksikograaf en vakgebiedekspert Vakgebiedekspert
Ontvanger Doelteksleser (tekstresepse: lees)	Ontvanger TSD-(semi)deskundige (tekstriksproduksie: skryf, vertaling, revisie en tekstresepse: lees) Leek (tekstresepse: lees) Vertaler (professioneel, student) Revisie (professioneel)

3.3 Wat word in 'n glossarium opgeneem?

Volgens Roby (1999: 96) besluit die vertaler onafhanklik van die doelteksleser wat hy/sy as gebrekkig in die leser se kennis sien, en dus verduidelik moet word. 'n Mens kan so ver gaan as om te sê die vertaler besluit instinktief watter woorde hoogs waarskynlik vreemd vir die leser is, watter betekenis nie uit die konteks afgelei kan word nie, en watter betekenis noodsaaklik vir die verstaan van die doelteks of daardie spesifieke deel van die doelteks is. Dit kan daar toe lei dat leksikale items wat in doelteksglossariums opgeneem word, onsistemies en ietwat lukraak gekies word en grotendeels op die vertaler se oordeel berus.

Aan die leksikografiese kant is die veronderstelling dat vakgebiedverwante terme heelwat meer konsekwent opgeneem word en dat die terme ook bewus gemyn word deur die leksikograaf en/of terminoloog, en die vakspecialis of deur die vakspecialis alleen. Faktore wat hier 'n rol speel, sentreer meer om die korpus waaruit die terme onttrek word, byvoorbeeld is die bronne gesaghebbend en is die korpus verteenwoordigend genoeg van die vakgebied. Die leser speel nie hier soseer 'n rol in die besluit of 'n term opgeneem moet word of nie.

Die opname in die glossariums in vertaalde tekste is uiteraard teksspesifiek, want hierdie glossarium vorm deel van die parateks van die betrokke doelteks. Al die items wat opgeneem word, is ook sterk afhanklik van die betrokke konteks waarin hulle gebruik word, want dit is dikwels die vreemde kultuurspesifieke konteks wat veroorsaak dat die item in die doelteks nie volledig of glad nie begryp word nie.

Die teendeel geld by die leksikografiese glossarium: die terme wat opgeneem word, is nie tekspesifiek nie, maar wel vakspesifiek en daarom ressorteer dit meestal onder TSD. Meestal is die terme onafhanklik van die konteks waarin dit gebruik word, want die onafhanklikheid van die konteks is juis een van die onderskeidende eienskappe tussen terme en algemener leksikale items. Een konsep word meestal deur een term benoem ongeag die konteks of teks waarbinne dit gebruik word. Soms is vakterme wel kontekspesifiek en die leser bepaal of dit 'n vakterm of nieprofessionele term is wat gebruik kan word, bv. rubella teenoor Duitse masels. In veral die vakgebied van die Regte word een konsep ook nie altyd deur een term beskryf nie; vergelyk hier byvoorbeeld die verskillende terme tussen die Amerikaanse *attorney* en *lawyer* teenoor die Britse *barrister* vir wat feitlik dieselfde konsep benoem.

Die vertaler moet deurentyd ook die versteckdoelteksleser se vaardigheidsvlak in die pragmatiese bronkultuurkennis in gedagte hou; dit geld sowel die besluit vir watter leksikale item (definiendum) in die glossarium opgeneem word as die besluit oor hoe die beskrywing van die leksikale item (definiens) daar moet uitsien. Dit is baie gevra van die vertaler wat 'n minder dominante taal soos Afrikaans in Engels moet vertaal in Suid-Afrika waar Engels sowel 'n amptelike taal as die lingua franca is. Hou die vertaler die plaaslike Engelstalige leser in gedagte of word daar voorsien in die behoeftes van die internasionale Engelse mark, wat vanselfsprekend ook heeltemal divers is? Soos reeds gesê, is die leser nie juis ter sake by die keuse van die definiendum in die leksikografiese glossarium nie, maar die opsteller moet die leser wel deeglik in gedagte hou by die skryf van die definiens. Laasgenoemde sal bepaal word deur die leser se vlak van spesialisering (ekspert, semi-ekspert, leek) in die betrokke vakgebied.

Die inhoud van glossariums in vertaalde werke het meer met kennis as taal, en meer met pragmatiek as linguistiek te doen. Hierdie kennis is kultureel en/of pragmatis en gewoonlik ensiklopedies van aard. Weens teenstrydighede of selfs konflik tussen die bron- en doelteks se kommunikatiewe situasie kan die oordrag van hierdie kennis tot 'n verlies aan betekeniskomponente uit die bronreks, of verlies aan begrip deur die doelteksleser lei. Hierdie kennis of leksikale items kan só bronkultuurpesifiek wees dat leksikale gapings tussen die bron- en doeltaal voorkom. Aangesien hierdie soort leksikale items in die vertaling hoofsaaklik oorgedra of ontleen word, is dit juis dié items wat in literêre werke geglos moet word. Indien hierdie terme vertaal word, kan dieselfde inligting moontlik oorgedra word, maar gewoonlik word 'n onakkurate of kultureel vals boodskap of beeld deur die vertaler gesuggereer, byvoorbeeld wanneer *sangoma* as *wizard* of *biltong* as *dried meat* vertaal word.

Tabel 3: Wat geglos word: vertaling teenoor leksikografie

Vertaling	Leksikografie
Kultuurspesifieke leksikale items – leksikale gapings in doelstaal, bv. <i>sangoma</i>	Vakgebiedverwante terme
Taal vir algemene en spesifieke doeleteindes	Taal vir spesifieke doeleteindes
Teksafhanklik	Vakgebiedspesifiek; teksonafhanklik
Konteksafhanklik	Konteksonafhanklik/-afhanklik
Doeleksleserafhanklik (definiendum en definiens)	Leseronafhanklik vir definiendum; Leserafhanklik vir definiens.
Lukraak gekies	Bewus gekies

3.4 Waar kom die glossarium in die teks voor?

Glossariums word gewoonlik afsonderlik van die hoofteks aangetref ten einde nie die leesvloeい te versteur nie. By literêre vertalings word glossariums nog verder van die teks verwijder; hulle word normaalweg aan die einde van die teks aangetref alhoewel dit soms ook heel voor in die boek geplaas kan word. Aangesien glossariums van die hoofteks geskei word, kan lezers besluit om dit te ignoreer indien hulle verkies om self hulle pad deur die teks te vind en begripsprobleme self op ander wyses te oorkom, byvoorbeeld deur middel van die konteks. Lesers kan ook besluit om dele van die teks wat hulle nie verstaan nie, te ignoreer indien hulle van mening is dit sal hulle nie verhinder om die narratief van die boek te volg nie.

Met dié dat glossariums bykomend tot die doelteks is, behoort dit aan wat Genette (1997) 'parateks' noem; 'n term wat gebruik word om materiaal te beskryf wat aanvullend tot 'n teks is en kommentaar lewer op die teks, dit evalueer of andersins op 'n bepaalde wyse raam.

Literêre vertaalde produkte het gewoonlik 'n baie sterk verbintenis met die bronsteks maar Toledano Buendía (2013: 150) wys daarop dat glossariums in vertaalde tekste nie parateks in die *bronsteks* is nie, maar slegs as parateks in die *doelteks* optree. Die leksikale items wat die vertaler kies om te glos, is egter gewoonlik elemente wat direk uit die bronsteks oorgedra word en sodoende kan daar aangevoer word dat die glossarium steeds aan die bronsteks gekoppel is.

In die leksikografie is die glossarium dikwels die sentrale of hoofteks wat deur buiteteks omring kan word. Die posisie waar glossariums in teks geplaas word in die onderskeie vakgebiede is die presiese spieëlbeeld van mekaar.

Tabel 4: Die plasing van glossariums: vertaling teenoor leksikografie

Vertaling	Leksikografie
Parateks	Sentrale teks
Word deur sentrale teks voorafgegaan of gevolg	Omring deur buiteteks

4. Tekstuele aspekte

Ek gaan nou die tekstuele aard van glossariums in onderskeidelik die vertaalwetenskap en metaleksikografie bespreek. Daar word aandag gegee aan die onderskeie maniere waarop daar geglos word, maar dan verskuif die fokus na die wyse waarop die gebruiker se behoeftes die aanbod van die glosartikel behoort te beïnvloed. Hier word kortliks bespreek hoe die gebruiker die betrokke glos in die onderskeie tipes glossariums vind, die behoeftes aan die toevoeging, al dan nie, van linguistiese inligting in die onderskeie artikels, en die afdeling word afgesluit met die rol van die konteks in die skryf van die onderskeie definisiense sowel as die mate van leksikale digtheid in die onderskeie tipes glossariums.

4.1 Hoe word daar geglos?

Hoewel die glossarium wat in literêre vertalings gebruik word (beslis) nie as woordeboek diens behoort te doen nie, stem dit wel ooreen met 'n woerdeboek en daarom gebruik ek metaleksikografiese terminologie om na albei tipes glossariums te verwys:

- Die leksikale item wat geglos word, is die 'lemma' (inskrywing) of 'definiendum',
- en die deel wat die lemma verduidelik of beskryf, is die 'definiens'.

'n Literêre glossarium is gewoonlik twee- of meertalig, hoewel dit net aan een spesifieke doelteks geadresseer is. Dit kan egter ook eentalig wees. Die lemma, of definiendum, is 'n woord wat vanuit een spesifieke bronstaalteks na die doelteks oorgedra is, met die definiens in die doeltaal. Dieselfde geld vir leksikografiese glossariums, met die **adres** die vernaamste verskil, naamlik hier is die

adres 'n spesifieke vakgebied. Die onderskeie adresse blyk duidelik uit die onderstaande voorbeeld in tabel 6–13.

Tabel 5: Tipes glossarium: vertaling teenoor leksikografie

Vertaling	Leksikografie
Tweetalig – Beskrywend in doeltaal + (Vertaalekwivalent)	Tweetalig – Vertaalekwivalent + (Beskrywend dikwels in brontaal)
Meertalig – Beskrywend + (Vertaalekwivalent)	Meertalig – Vertaalekwivalent + (Beskrywend)
Eentalig – Beskrywend	Eentalig
Adres: spesifieke doelteks	Adres: spesifieke vakgebied

Tabel 6: Tweetalige glossarium: vertaling – Beskrywend en vertalend

Afrikaans	Engels
Babalas	Hangover, hung over
Kaiings	Crackling, the crisp, fatty skin of roast pork
Platteland	Farmland, country areas, flat country
(Van Heerden, E. 2013. <i>In Love's Place</i> . Johannesburg: Penguin Books)	

Tabel 7: Tweetalige glossarium: leksikografie – vertalend

Engels	Spaans
Acrylic solution	Solución acrílica
Body color	Color de cubierta
Designer colors	Colores de diseño
(Glossary of Art Terms & Definitions http://babel-linguistics.com/wp-content/uploads/Glossary-Art.pdf)	

Tabel 8: Tweetalige glossarium: leksikografie – vertalend + beskrywend in brontaal

Engels	Duits
Interpreter	Dolmetscher Provides oral (spoken) translation of a speaker's words from one language into another.
B language	B-Sprache A language that a translator or interpreter can speak, read and write almost as well as their native language (or A language), and well enough to translate into as well as out of.
<i>(Glossary of Translation & Interpreting Terms & Definitions http://babel-linguistics.com/wp-content/uploads/Glossary-Art.pdf)</i>	

Tabel 9: Meertalige glossarium: vertaling

Afrikaans of Engels	Frans
meerkat	mangouste
velskoens	chaussures de cuir vert
staffriding	passagers s'accrochant à l'extérieur des wagons de chemin de fer
(Van Heerden, E. 1990. <i>Le domaine de Toorberg</i> . Parys: Stock)	

In tabel 9 word lemmas in dieselfde glossarium aangetref in Afrikaans (*meerkat*), Afrikaans wat in Engels genaturaliseer is (*velskoens*) of in Engels (*staffriding*) en die definiens word deurgaans in Frans as vertaling of beskrywing gegee.

In tabel 10 word vertaalekwivalente vir die brontaallemma gewoon in meer as een doelstaal verskaf.

Tabel 10: Meertalige glossarium: leksikografie

Engels	Duits	Spaans
Entry ban	Einreiseverbot	Prohibición de entrada
Genocide	Völkermord	Genocidio
Minority	Minderheit	Minoría
<i>(European Commission Asylum and Migration Glossary 3.0 http://ec.europa.eu/dgs/home-affairs/what-we-do/networks/european_migration_network/docs/emn-glossary-en-version.pdf)</i>		

By sommige lemmas word ook 'n beskrywing in die brontaal verskaf sowel as vertaalekwivalente in meer as een doelstaal vir meertalige glossariums wat onder die leksikografie ressorteer. Sien tabel 11:

Tabel 11: Meertalige glossarium: leksikografie

Engels	Engelse beskrywing	Duits	Spaans
adaptation	Process of modifying some or all of one's beliefs and/or attitudes so as to suit new conditions of life.	Anpassung/ Adaptation	Adaptación
<i>(European Commission Asylum and Migration Glossary 3.0 http://ec.europa.eu/dgs/home-affairs/what-we-do/networks/european_migration_network/docs/emn-glossary-en-version.pdf)</i>			

Sommige inskrywings in 'n literêre glossarium kan ook eentalig wees, bv. wanneer 'n Suid-Afrikaanse Engelse woord vir internasionale lesers geglos word of wanneer die brontaalwoord 'n vertaalekwivalent het maar die pragmatiese of kulturele verwysings tussen die twee gemeenskappe verskil. Sien Winterbach (2007/2010) waar Suid-Afrikaanse Engelse woorde by 'n glossarium ingevoeg is vir 'n vertaling uit Afrikaans in Engels. Alhoewel die woorde in Engels geglos word, word hulle in die glossarium beskryf soos in tabel 12 gesien word.

Tabel 12: Voorbeeld van inskrywings in 'n eentalige vertaalglossarium

Suid-Afrikaanse Engels	Engels
handsupper	member of the Boer forces who surrendered to the British
leguaan	a large amphibious monitor lizard

Dieselde bewerking word ook in die leksikografie aangetref waar die definisie in die dieselde taal as die lemma verskaf word wanneer die betrokke lemma in onbruik verval het of 'n heel spesifieke betekenis binne 'n besondere vakgebied het. Sien tabel 13 vir soortgelyke gevalle met terme uit die Amerikaanse burgeroorlog.

Tabel 13: Voorbeeld van inskrywings in 'n eentalige vakspesifieke glossarium – leksikografie

Engels	Engels
ambulance	A two-wheeled or four-wheeled wagon or cart used to transport wounded or sick soldiers
cash crop	A crop such as tobacco or cotton which was grown to be sold for cash — not grown for food like corn or wheat
goober pea	A common Southern term for "peanut"

*(Glossary of Civil War Terms:
<http://www.civilwar.org/education/history/glossary/glossary.html>)*

4.2 Hoe vind die gebruiker die glos?

Alhoewel die aanbod van die lemmas in albei tipes glossariums meestal alfabeties is, is die pad waardeur die gebruiker tot by 'n spesifieke lemma in die onderskeie glossariums kom, anders by die vertaalglossarium as by die leksikografieglossarium. Die gebruiker van die vertaalglossarium begin lees nie die boek met die idee om 'n glossarium te raadpleeg nie; dit gebeur onverwags en die vertaalgebruiker kan kies om die glossarium te ignoreer en self die betekenis van die betrokke lemma uit die verhaal probeer aflei. Die leksikografieglossarium se gebruiker daarenteen besluit gewoonlik doelbewus om die lemma na te slaan en vind die betrokke lemma dan gewoon alfabeties gelys.

Die wyse waarop vertaallesers attent gemaak word op die aanwesigheid

van 'n glossarium in die vertaalde werk, is deur die gebruik van strukturele merkers om geglosde woorde aan te du: hierdie woorde word gekursiveer, of onder ander met 'n asterisk, boskrif of onderskrif gemerk. Dit gebeur gewoonlik net die eerste keer dat die woorde in die doelteks gebruik word. Dit is ook moontlik dat meer as een merker gebruik word, bv. kursiewe druk en 'n asterisk, met die ander uiterste dat geen aanduiding gegee word of die woorde geglos is, al dan nie. Laasgenoemde is nie baie lesersvriendelik nie en gebeur gewoonlik wanneer 'n glossarium aan die begin van die boek verskaf word. Die Afrikaanse roman *Toorberg* (Van Heerden 1986) is in Engels onder die titel *Ancestral Voices* (1989) vertaal. Die Engelse teks word deur 'n glossarium bestaande uit 27 inskrywings voorafgegaan, en 'n mens wonder of die vertaler van die leser verwag om die glossarium te memoriseer voordat die boek gelees word.

4.3 Linguistiese inligting

By die leksikografieglos kan daar soveel linguistiese inligting moontlik aan die gebruiker verskaf word mits dit per glossarium konsekwent gedoen word. Dit sal veral van hulp wees indien die gebruiker hierdie terme moet gebruik om teks te produseer. Sien tabel 14 en 15.

Tabel 14: Linguistiese inligting: uitspraak, woordsoort en morfologiese inligting, bv. meervoud en sillabeverdeling

Gluteus Maximus Pronunciation: \-'mak-sə-məs\	Function: noun pl glutei max*ɪ*mi (Pronunciation: \-sə-,mī\) The outermost of the three muscles in each buttock that arises from the sacrum, coccyx, back part of the ilium and adjacent structures, that is inserted into the fascia lata of the thigh and the gluteal tuberosity of the femur, and that acts to extend and laterally rotate the thigh
Biceps Pronunciation: \'bī-,səps\	Function: noun pl biceps (also bi*ceps*es) A muscle having two heads: as a: the large flexor muscle of the front of the upper arm b: the large flexor muscle of the back of the upper leg
<p>(Food, Nutrition and Diet Glossary: http://www.bettermedicine.com/category/food-nutrition-and-diet/glossary;jsessionid=0CD57B56AA040AC04307AB48F6C354A0?redirect=beme)</p>	

Tabel 15: Linguistiese inligting: uitspraak, morfologiese inligting, bv. meervoud en sillabeverdeling, etimologie

Dechiyah (d'-KHEE-yah)	(pl. Dechiyot [d'-khee-YOHT]) A rule postponing the date of the new year when calculating the Jewish Calendar. There are four dechiyot, but some are more commonly applied than others
Kohein (KOH-hayn)	(pl. Kohanim [koh-HAHN-eem]) Priest. A descendant of Aaron, charged with performing various rites in the Temple. This is not the same thing as a rabbi
Navi (nah-VEE)	(pl. Nevi'im [n'-vee-EEM]) From niv sefatayim meaning "fruit of the lips." A prophet. A spokesman for G-d, chosen to convey a message or teaching. Prophets were role models of holiness, scholarship and closeness to G-d
<i>(Glossary of Jewish Terminology: http://www.jewfaq.org/glossary.htm)</i>	

Linguistiese inligting, soos in tabel 16 aangetoon, is meestal opsioneel in die vertaalglossariums en beperk tot uitspraak en etimologie, want die idee is nie dat die gebruikers die woorde ooit vir teksproduksie sal gebruik nie, maar uiteraard slegs vir teksresepsie. Die vraag ontstaan of linguistiese inligting hoegeenaamd nodig is, want dit kan die aandag van die gebruiker aftrek van die verhaal en die oordrag van die betekenis van die spesifieke glos.

Tabel 16: Linguistiese inligting in vertaalde teks: etimologie en uitspraak

dagga	<i>Cannabis sativa</i> (mot probablement d'origine khōï: le g se prononce comme la jota espagnole)
kraal	enclos à bétail (mot dérivé du portugais <i>curral</i>); village africain, traditionnellement bâti autour de l'enclos
miesies	patronne (dérivé de l'anglais <i>Mrs.</i>), voir <i>baas</i>
(Van Heerden, E. 2005. <i>Un long silence</i> . Parys: Phébus)	

4.4 Konteks en leksikale digtheid by geglosde items

In paragraaf 3.3 is reeds verwys na die rol van die gebruiker by die uitkies van die betrokke lemma wat in die glossarium opgeneem moet word. Die gebruiker speel wel ook 'n bepalende rol by die keuse van inligting wat in die definiens opgeneem word en vir die leksikograaf word die gebruiker eers in ag geneem by die beskrywende deel van die artikel. Die definiens is nie konteksafhanklik vir die leksikograaf nie, want die term behoort eenduidig verklaar te word vir alle kontekste. Die omvang van ensiklopediese inligting wat gebruik word en die eenvoud van die beskrywing kan wel wissel na aanleiding van die gebruiker vir wie die glossarium bedoel is. Die beskrywing kan ook normatief en preskriptief in die leksikografieglossarium wees om die gebruiker te lei hoe om die term binne die spesifieke vakgebied te gebruik.

Vir vertaling is die leser reeds van belang by die keuse van die betrokke lemma wat geglos word, maar eweno in die beskrywende deel van die glossariumartikel. Hierdie definiense is altyd besonder kontekspesifiek omdat slegs die relevante betekenis in die vertaalde boek vir die gebruiker geaktiveer hoef te word. In die glossarium van *My Name is Vaselinetjie* (Von Meck 2009) is *walking stick* die definiens vir *kierie* terwyl in *In Bushveld and Desert: A Game Ranger's Life* (Bakkes 2008) twee definiense gegee word — *walking stick* en *fighting stick* — aangesien albei betekenisse in die konteks van laasgenoemde boek geaktiveer word. In *Un long silence* (Van Heerden 2005) word slegs die betekenis van *fighting stick* in die definiens bepaal: *massue de combat africaine traditionnelle*.

Nog iets wat die vertaler in gedagte moet hou, is dat 'n definiens nie 'n besonder hoë leksikale digtheid moet hê nie, wat maklik kan gebeur wanneer die vertaler daarop moet konsentreer om ensiklopediese pleks van linguistiese inligting te gee. Die rede waarom die leksikale digtheid laag gehou moet word, is dat die definiens die lees van die hoofteks moet faciliteer en nie die primêre leesvloeи moet belemmer nie. Definiense moet daarby hou om die lees van die teks te ondersteun en moenie die dialoog tussen die outeur en leser onderbreek nie. Die vertaler moet ook nie die sekondêre of — nog erger — die hoofstorieverteller raak nie; dit impliseer ook dat die vertaler die inligting in die definiens so objektief moontlik moet weergee, en moet probeer om nie enige eie mening uit te spreek nie. Die vertaler moet ook nie enige inligting verduidelik wat eksplisiet deur die outeur verskaf word nie, en moenie die teks vir die leser interpreteer nie. Vertalers moet nooit hulle lezers se vermoë onderskat om self onduidelikhede in 'n teks uit te pluis nie; hulle lees op stuk van sake 'n literêre teks.

Dit beteken nie definiense moet te kripties wees nie, maar lezers moet eintlik uit die definiens se inhoud kan aflei waarom die woord in die doelteks oorgedra is. Steyn (2013: 227-228) merk op dat die bykomende geglosde items in die Franse vertaling van *Toorberg* (Van Heerden 1990) te oorsigtelik gedoen is. *kaross: peau de bête* en *korhaan: gros oiseau*. Hierdie definiense verskaf byna generiese inligting met geen inligting of iets bykomends wat die items as tipies

Suid-Afrikaans of Afrikaans identifiseer nie. Vergelyk byvoorbeeld *kaross* met die glossariuminskrywing in die Engelse Winterbach (2007/2010): *a blanket of softened skins used as bed or floor covering or cloak*.

Woordeboekdefinisies moet verkieslik in vertaalglossariums vermy word. Net so moet vertaalglossariums nie uit 'n lys vertaalekwivalente bestaan nie. Tweetalige woordeboeke gee nie die betekenis van leksikale items nie maar eerder 'n lys moontlike vertaalekwivalente; indien glossariums egter uit vertaalekwivalente bestaan, kan die vertaler van meet af die doelteksekwivalent gebruik. Terloops, woorde wat onveranderd uit die bronstaal in die doelteks oorgedra word, behoort nie maklik met 'n vertaalekwivalent vervang te kan word nie. Neem byvoorbeeld die volgende glossarium op 'n spyskaart van Fyndraai Restaurant by Solms-Delta Landgoed. Terme soos dié in tabel 17 behoort byvoorbeeld nie geglos te word nie aangesien dit nie tradisionele kulinêre items is nie, maar bloot kulinêre items:

Tabel 17: Vertaalekwivalente as definiense in 'n vertaalglossarium

klapper	coconut
koljander	coriander
lemmetjie	lime
pietersielie	parsley
sous	sauce
vinkel	fennel
witwortel	parsnip

Vertaalekwivalente kan as aanvullende inligting in die definisie gebruik word, maar die definisie moenie net daaruit bestaan soos wat ook by *meerkat* en die Franse *mangouste* (tabel 9) die geval is nie.

Oobseniteite, nes ander leksikale items met hoofsaaklik emosionele waarde en baie min semantiese inhoud soos uitroep, is weens die moeilike oordrag van dieselfde emosie tussen verskillende kulture byna onmoontlik om te vertaal. Die emosionele waarde en betekenis van hierdie woorde is ook oorwegend konteksafhanklik: dit kan byvoorbeeld 'n reeks emosies tussen twee uiterstes van positiwiteit en negatiwiteit oordra. Dít is die tipe leksikale items wat 'n mens sou verwag onveranderd vanuit die bronsteks in die doelteks oorgedra en geglos sou word. Wat 'n mens nie verwag nie, is dat hierdie definisiene soms uit

vertaalekwivalente bestaan. Vergelyk die volgende:

Tabel 18: Definiense vir vloekwoorde in vertaalglossariums

moer	hit, punch (Von Meck 2009)
Moer	beat up (Bakkes 2008)
Donner	wallop (Bakkes 2008)
moerse!	great! (Von Meck 2009)
voertsek	clear off, away with you (Von Meck 2009)
Voertsek!	Bugger off! (Bakkes 2008)
Gatvol	extremely fed up (Bakkes 2008)
Goeie bliksem!	Good grief! (Bakkes 2008)

Vir die eerste drie definiense in tabel 18 gee die vertaler beskrywings; die beskrywings is egter redelik kripties en daar is geen aanduiding dat kru taal gebruik word nie. Daarbenewens is die kontekstuele betekenis van *Moer* en *Donner* taamlik dieselfde en tog word verskillende definiense in dieselfde glossarium verskaf. Die vertaler gee 'n vertaalekwivalent vir *moerse!* pleks daarvan om dit te beskryf as bv. *expressing a very positive feeling in a crude way*. Twee soorte definiense word vir *voertsek* verskaf: die eerste is meer beskrywend, en die tweede is 'n vertaalekwivalent waarvan die emosionele en taboewaarde moontlik as sterker as dié van die brontekswoord ervaar kan word. *Bugger off!* gee ten minste 'n aanduiding van die kru styl wat in die bronteks gebruik word. *Gatvol* word behoorlik beskryf hoewel die informele en taboe-aard nie aangedui word nie. *Goeie bliksem!* sowel as *Voertsek!* word egter weereens deur 'n vertaalekwivalent verduidelik, hoewel die emosionele en taboewaarde baie geringer is as wat in die bronteks uitgedruk word.

Uiteraard is dit heeltemal aanvaarbaar om definiense wat hoofsaaklik uit vertaalekwivalente bestaan, te gebruik in leksikografieglossariums met die hooffunksie om ekwivalente in 'n ander taal vir 'n spesifieke vakgebied te verskaf.

Tabel 19 gee opsommenderwys die verskille tussen die definiense van vertaal- en leksikografieglossariums:

Tabel 19: Definiensverskille tussen vertaal- en leksikografieglossariums

Vertaling	Leksikografie
Deskriptief	Deskriptief (kan normatief wees)
Lae leksikale digtheid	Leksikale digtheid kan hoog wees
Verkieslik geen vertaalekwivalente nie	Vertaalekwivalente somtyds vereis

5. Gevolgtrekking

Die gebruik van die item in 'n glossarium deur vertaling en leksikografie was aanvanklik op dieselfde lees geskoei, maar het met verloop van tyd so ver uitmekaar gedryf ten opsigte van die meeste aspekte, dat verskillende terme vandag deur die verskillende vakgebiede gebruik behoort te word. My voorstel is dat *glossarium* vir die verklarende woordelys in literêre vertalings en verklarende woordelyste as deel van die parateks van ander tipe boeke gereserveer word, en dat *spesialiswoordeboek* (eentalig, tweetalig, meertalig) vir die vakgebied leksikografie gebruik word.

Sien Fuertes-Olivera en Tarp (2014: 19-20) se siening oor die gebruik van die term *spesialiswoordeboek* vir 'n wye reeks van hierdie tipe woordeboek:

Of course, this inclusion of a wide range of lexicographical works under the same umbrella does not mean that the differences between them should be ignored. It is evident that the production of dictionaries conceived to solve communication problems, dictionaries designed to provide quick information about a specific subject, and dictionaries (or encyclopaedias) permitting a profound study of one or more subject fields, present different challenges and require different practical solutions. Dictionaries or encyclopaedias with particularly long articles — sometimes dozens or even hundreds of printed pages — require, for instance, special lexicographical techniques in order to provide easy access to specific data incorporated and scattered internally in these articles. (Fuertes-Olivera en Tarp 2014: 19-20)

Bogenoemde "wide range of lexicographical works" word egter verenig deur die fundamentele feit dat dit uiters gespesialiseerde verwysingswerke is wat vir raadpleegdoeleindes ontwerp is. Die werke vorm 'n kontinuum en Fuertes-Olivera en Tarp (2014: 20) argumenteer dat die verskille ten opsigte van omvang en ander kenmerke uiteindelik bepaal word deur die onderskeie behoeftes wat hierdie werke bedoel om te bevredig. Hierdie behoeftes word weer bepaal deur sowel die aard van die potensiële gebruikers as die sosiale situasies waarmee hulle ten nouste verbind is en waar die werke 'n spesifieke funksie moet vervul.

Die gebruik van twee afsonderlike terme in die twee velde kan moontlik die konseptuele verwarring en misverstand onder mense beëindig wat vakkultuur oor die term *glossarium* binne albei vakdissiplines lees. Maar dit sal ook help indien die verskillende betekenisste wat aan hierdie twee terme gekoppel word, behoorlik binne elke vakgebied beskryf word. Die Metaleksikografie het al baie verder gekom as die Vertaalwetenskap in die ondubbelsoortige beskrywing van metaleksikografiese terminologie. Moontlik is dit die rede waarom die term *glossarium* in leksikografiese terme verstaan en verduidelik word — selfs wanneer glossariums in literêre vertaling dikwels op 'n heeltemal ander manier gebruik word en 'n heel ander funksie het.

Bronnelys

Akademiese literatuur

- De Roubaix, L.** 2012. Where Boundaries Blur: André Brink as Writer, Bilingual Writer, Translator and Self-translator. Herrero, I. en T. Klaiman (Reds.). 2012. *Versatility in Translation Studies: Selected Papers of the CETRA Research Seminar in Translation Studies 2011* [Aanlyn]. Beskikbaar: <http://www.kuleuven.be/cetra/papers/papers.html> [10 Maart 2014].
- Fuertes-Olivera, P.A. en S. Tarp.** 2014. *Theory and Practice of Specialised Online Dictionaries: Lexicography versus Terminography*. Berlyn/Boston: De Gruyter.
- Hatim, B. en J. Munday.** 2004. *Translation: An Advanced Resource Book*. Londen/New York: Routledge.
- Gambier, Y. en L. van Doorslaer (Reds.).** 2009. *The Metalanguage of Translation*. Amsterdam/Philadelphia: Benjamins.
- Genette, G.** 1997. *Paratexts: Thresholds of Interpretation*. Cambridge: Cambridge University Press.
- Kudashev, I.** 2007. Terminography vs. Lexicography Opposition Revisited. *Översättningsteori, fackspråk och flerspråkighet*. Publikationer av VAKKI 34: 157-166.
- Marco, J.** 2009. The Terminology of Translation: Epistemological, Conceptual and Intercultural Problems and their Social Consequences. Gambier, Y. en L van Doorslaer (Reds.). 2009. *The Metalanguage of Translation*: 65-80. Amsterdam/Philadelphia: Benjamins.
- Munday, J. (Red.).** 2009. *The Routledge Companion to Translation Studies*. Londen/New York: Routledge.
- Nkomo, D. en M. Madiba.** 2011. The Compilation of Multilingual Concept Literacy Glossaries at the University of Cape Town: A Lexicographical Function Theoretical Approach. *Lexikos* 21: 144-168.
- Pym, A.** 2011. Translation Research Terms: A Tentative Glossary for Moments of Perplexity and Dispute. Pym, A. (Red.). 2011. *Translation Research Projects* 3: 75-110. Tarragona: Intercultural Studies Group.
- Roby, W.** 1999. What's in a Gloss? *Language Learning and Technology* 2(2): 94-101.
- Snell-Hornby, M.** 2009. 'What's in a Name?': On Metalinguistic Confusion in Translation Studies. Gambier, Y. en L. van Doorslaer (Reds.). 2009. *The Metalanguage of Translation*: 123-134. Amsterdam/Philadelphia: Benjamins.
- Steyn, J.E.T.** 2013. 'n Direkte vertaling versus 'n abbavertaling met verwysing na kulturele oordrag. Ongepubliseerde Ph.D.-proefskrif. Stellenbosch: Universiteit Stellenbosch.

Toledano Buendía, C. 2013. Listening to the Voice of the Translator: A Description of Translator's Notes as Paratextual Elements. *Translation & Interpreting* 5(2): 149-162.

Woordeboeke en fiksie

- Bakkes, C.** 2008. *In Bushveld and Desert: A Game Ranger's Life*. Kaapstad: Human & Rousseau.
- Beukes, A.-M. en M. Pienaar (Reds.).** 2010. *Veeltalige vertaalterminologie/Multilingual Translation Terminology*. Pretoria: Van Schaik.
- Deslisle, J., H. Lee-Jahnke en M.C. Cormier (Reds.).** 1999. *Translation Terminology*. Amsterdam/Philadelphia: Benjamins.
- Hartmann, R.R.K. en G. James.** 1998. *Dictionary of Lexicography*. Londen/New York: Routledge.
- MonAKO. Online Glossary of Translation Studies Terms**, University of Helsinki [Aanlyn]. Beskikbaar: http://www.liing.helsinki.fi/monako/atk/glossary_ab.shtml [11 Maart 2023].
- Shuttleworth, M. en M. Cowie.** 1997. *Dictionary of Translation Studies*. Manchester: St Jerome.
- Van Heerden, E.** 1986. *Toorberg*. Kaapstad: Tafelberg.
- Van Heerden, E.** 1989. *Ancestral Voices*. Londen/New York: Penguin.
- Van Heerden, E.** 1990. *Le domaine de Toorberg*. Parys: Stock.
- Van Heerden, E.** 2005. *Un long silence*. Parys: Phébus.
- Von Meck, A.** 2009. *My Name is Vaselinetjie*. Kaapstad: Tafelberg.
- Wiegand, H.E., M. Beißwenger, R.H. Gouws, M. Kammerer, M. Mann, A. Storrer en W. Wolski (Reds.).** 2017. *Wörterbuch zur Lexikographie und Wörterbuchforschung/Dictionary of Lexicography and Dictionary Research*. Vol. 2: D-H. Berlyn/New York: De Gruyter.
- Winterbach, I.** 2007. *To Hell with Cronjé*. Kaapstad: Human & Rousseau.
- Winterbach, I.** 2010. *To Hell with Cronjé*. New York: Open Letter.